



UTeM Harumkan Nama Negara di PAMERAN ANTARABANGSA GENEVA 2011

Penyelidik UTeM mencipta kejayaan gemilang di peringkat antarabangsa ketika menyertai 39th International Exhibition of Inventions di Geneva, Switzerland yang berakhir baru-baru ini.

Pada pertandingan inovasi tersebut, pasukan penyelidik UTeM telah meraih dua pingat emas, dua perak dan satu gangsa melalui produk-produk yang dipertandingkan. Lebih membanggakan apabila UTeM turut menerima anugerah khas daripada Swiss Automobile Association.

Ketua pasukan penyelidik UTeM Dr. Zamberi bin Jamaluddin berkata, pertandingan inovasi di Geneva merupakan acara yang mendapat perhatian dunia di mana pereka, penyelidik dan pihak industri berhimpun di bawah satu bumbung untuk melihat kehebatan produk inovasi yang dihasilkan.

"Kejayaan kami di sini adalah berkat doa seluruh warga UTeM yang sentiasa memberi sokongan dan dorongan terhadap usaha kami untuk mengharumkan nama universiti dan Malaysia di pentas antarabangsa" kata Zamberi ketika dihubungi semalam.

Katanya lagi, beberapa syarikat antarabangsa antaranya Dan Technocraft dari Perancis, Alpheus.Com dari Switzerland serta agensi pemasaran dan perkomersilan dari Itali, Jerman dan Croatia menunjukkan minat yang tinggi terhadap hasil inovasi UTeM serta berhasrat untuk menjadi rakan strategik dalam memasarkan produk berkenaan.

Pada pertandingan tersebut, produk yang merangkuli Anugerah Khas daripada Swiss Automobile Association dihasilkan oleh penyelidik dari Fakulti Kejuruteraan Elektronik dan Kejuruteraan Komputer (FKEKK) yang diketuai oleh Engr. Siva Kumar A/L Subramaniam. Produk yang diberi nama 'SD-Traffic Light' merupakan inovasi terhadap lampu isyarat yang memberi kemudahan kepada pemandu yang mengalami masalah rabun warna.

Menurut Siva, terdapat segelintir pemandu yang mengalami masalah rabun warna dan perkara tersebut menimbulkan kesukaran untuk menentukan warna lampu isyarat. Secara tidak langsung ianya boleh mengundang bahaya kepada pengguna jalanraya yang lain. Lantaran itu, 'SD-Traffic Light' menggabungkan beberapa unsur penting seperti penggunaan simbol serta penggunaan lampu isyarat tunggal yang lebih menjimatkan kos.

Kata Siva, "Melalui produk ini, pemandu yang mempunyai masalah rabun warna dapat menentukan lampu isyarat dengan mudah berdasarkan simbol yang terpancar di lampu isyarat tunggal yang digunakan."

Bagi Naib Canselor UTeM, Prof. Datuk Ahmad Yusoff Hassan berkata, kejayaan penyelidik universiti itu di Geneva membuktikan bahawa hasil inovasi dari Malaysia mampu memberi impak besar kepada perkembangan teknologi masa kini.

Beliau yang ditemui di pejabatnya berkata, "UTeM sebagai IPTA teknikal di negara ini akan terus menggandakan usaha untuk memelopori bidang penyelidikan berteraskan teknologi tinggi bagi merealisasikan visi ke arah universiti teknikal yang kreatif dan inovatif terkemuka di dunia."

KANDUNGAN

UTeM Harumkan Nama Negara Di Pameran Antarabangsa Geneva 2011 | Majlis Profesor Negara Diraikan Dalam Majlis Ramah Mesra | MPP UTeM Hadiri Majlis Bersama Menteri Pengajian Tinggi | UTeM Jadi Destinasi Lawatan Delegasi Dari India | UTeM Meriahkan Sambutan Ulangtahun Ke-65 RTM | PRAKTIS UTeM Anjur Program Administrative Talk | ReCCA Serlahkan Prestij Sukan Rekreasi IPT | INOTEK 2011 UTeM Martabatkan Budaya Inovasi Mahasiswa | FKE Anjur Pertandingan Inovasi DENOTECH 2011 | FKP Anjur Pameran Projek Rekabentuk Pelajar | Pelajar Cemerlang FKE & FTMK Diraikan | Pelajar Kolej Komuniti Paya Besar Pahang Kagumi Hasil Inovasi UTeM | FPTT Anjur Majlis Sepetang Bersama Teknousahawan | Lawatan Tokoh NILAM Di UTeM - Martabatkan Budaya Membaca Di Kalangan Generasi Muda | Majlis Pelancaran Pelaksanaan Sistem Pengurusan Berkualiti Pejabat Pendaftar | UTeM Sertai Kursus Pengauditan Universiti | FTMK Ungguli Acara Bowling Sukan Antara Jabatan UTeM | PINTAR FTMK Mantapkan Pemahaman Visi dan Misi UTeM | Pusat Islam UTeM Bersama JAIM Anjurkan Program Baitu Saadah | PKKP Anjur Kursus Dedahkan Tanggungjawab Keselamatan Dan Kesihatan Pekerjaan | Berita Perkahwinan | Imagine Cup 2011 | UTeM Bebas Asap Rokok | Personaliti Pilihan



Editor BERITA@UTeM

KETUA EDITOR :

Prof. Madya Mohd Rahimi Bin Yusoff

WARTAWAN :

Mohd Khairulhusaini Bin Mohd Saad
Bob Faizeli Bin Mohamed Din

REKA BENTUK GRAFIK :

Aziza Binti Md Buang
Suria Binti Abdul Rahman

JURUFOTO :

Md. Nor Bin Mohamad Saleh
Nurulidayu Binti Talib
Mohd Farid Bin Supangi
Asri Bin Abu

PENGEDARAN :

Yang Sarinah Binti Mohd Talib
Rabea'tul Adawiyah Binti Zakariah

Majlis Bersama Menteri Pengajian Tinggi



Seramai 14 orang pelajar ahli Majlis Perwakilan Pelajar (MPP) UTeM telah menghadiri satu program ramah mesra bersama Menteri Pengajian Tinggi Datuk Seri Mohd. Khaled Nordin di Dewan Tun Hussein Onn, PWTC, Kuala Lumpur baru-baru ini.

Menurut Yang DiPertua MPP UTeM, Ahmad Saufi Ahmad Jawahir, pertemuan ini diadakan bertujuan untuk mendengar amanat dan ucapan Datuk Khaled kepada seluruh MPP Institusi Pengajian Tinggi Awam (IPTA) yang baru dipilih selepas diadakan pilihanraya kampus di samping memperkenalkan barisan kepimpinan.

Turut hadir dalam program ini ialah timbalan beliau Datuk Saifuddin Abdullah dan Ketua Setiausaha Kementerian Datuk Ab Rahim Mohd. Noor. Dalam ucapannya Datuk Khaled menggesa kepimpinan MPP perlu bertindak sebagai ejen perubahan, menjadi penghubung antara pelajar dan kepimpinan universiti.

Majlis Professor Negara Diraikan Dalam Majlis Ramah Mesra

Baru-baru ini bertempat di Perkampungan Ikan Bakar Umbai, seramai 45 orang ahli Majlis Professor Negara (MPN) diraikan dalam suasana penuh meriah. Ketibaan Pengerusi MPN, Prof. Emeritus Dato' Dr. Zakri Abd. Hamid telah disambut oleh Naib Canselor, Prof. Datuk Dr. Ahmad Yusoff Hassan dan barisan Pegawai Kanan universiti.

Majlis ramah mesra antara pengurusan universiti dan ahli MPN tersebut adalah bersempena dengan mesyuarat MPN yang diadakan di Bandaraya Melaka. Dalam ucapannya, Dato' Dr. Zakri melahirkan penghargaan kepada UTeM di atas penganjuran majlis yang sungguh bermakna dan berharap ianya dijadikan medan bertukar-tukar fikiran serta meluaskan jaringan kerjasama dalam memajukan institusi pengajian tinggi negara.



UTeM Jadi Destinasi Lawatan Delegasi Dari India

Imej UTeM selaku IPTA teknikal pertama di negara ini sentiasa menjadi tumpuan institusi pengajian tinggi antarabangsa. Baru-baru ini delegasi dari India telah mengadakan lawatan rasmi ke UTeM bagi meninjau dengan lebih dekat konsep pengajian teknikal yang dipelopori oleh universiti ini.

Delegasi tersebut telah disambut oleh Naib Canselor serta Pegawai-pegawai Kanan dan sesi perbincangan seterusnya diadakan di Bilik Mesyuarat Senat. Pada perbincangan tersebut, delegasi yang dianggotai oleh Prof. Manmohan Singh, Rajiv Jaiswal dan Naresh Trehan melahirkan minat untuk menjalinkan hubungan strategik dengan UTeM yang menumpukan aspek pertukaran pelajar serta merapatkan jurang teori dan amalan dalam pendidikan.

Berdasarkan perbincangan tersebut, kedua-dua belah pihak amat positif untuk menjalinkan kerjasama dalam bidang yang dibincangkan itu.



Apa pandangan anda mengenai BERITA@UTeM? Hantarkan pandangan / cadangan / sumbangan bahan anda melalui e-mail ke berita@utem.edu.my

Hak Cipta Terpelihara
Pejabat Perancangan Dan Komunikasi Korporat, Canselor
Universiti Teknikal Malaysia Melaka
Hang Tuah Jaya
76100 Durian Tunggal, Melaka
Tel : +606 331 6248 / 6249
Faks : +606 331 6247

UTeM Meriahkan *sambutan* Ulangtahun Ke-65 RTM

UTeM berganding bahu dengan Radio Televisyen Malaysia (RTM) Melaka FM bagi sama-sama menjayakan program bersama masyarakat bersempena dengan Sambutan Ulangtahun RTM ke-65 baru-baru ini di Masjid Kampung Sempang Serkam.

Program berkonsep dekat di hati masyarakat ini telah dilaksanakan dengan beberapa pengisian menarik yang telah bermula pada waktu petang antaranya program gotong-royong, sembahyang maghrib dan isyak berjemaah dan diselitkan dengan ceramah Permata Hati yang disiarkan secara langsung menerusi siaran radio Melaka FM.

Majlis perasmian program ini telah disempurnakan oleh ADUN Serkam Datuk Ghazale Mohamed yang juga merupakan Pengerusi Jawatankuasa Negeri Pengangkutan, Penerangan, Perpaduan dan Pengguna.

Pihak UTeM yang diwakili oleh pegawai dan kakitangan daripada Pejabat Perancangan & Komunikasi Korporat (PPKK) serta dibantu oleh pegawai Pejabat Hal Ehwal Pelajar & Alumni (HEPA) serta sebilangan pelajar UTeM telah mengagihkan sebanyak 400 pek cenderahati kepada penduduk sekitar kampung yang hadir ke program ini.



PUNCAK KINABALU *ditawan* UTeM



Pendaki UTeM dan ahli Kelab Esprit de Corp Bukit Katil Melaka telah berjaya menawan puncak gunung tertinggi di Malaysia iaitu puncak Gunung Kinabalu baru-baru ini lantas mencatatkan satu sejarah tersendiri buat universiti ini.

Menurut Mohd Rusdi Isohod yang merupakan Pengarah Program Misi Menawan Puncak Kinabalu berkata, kumpulan ini telah berjaya merealisasikan hasrat dan matlamat yang telah dirancang sebelum ini bagi menawan Puncak Kinabalu.

Tambah beliau lagi dengan berkibarnya bendera negeri Melaka di puncak Kinabalu ini maka tercapailah objektif utama misi menawan puncak Kinabalu serta mengibarkan bendera negeri Melaka bersempena dengan ulang tahun pengisytiharan Melaka sebagai Bandaraya Bersejarah.

Sememangnya usaha pendakian Puncak Kinabalu ini sentiasa menguji kekuatan mental dan fizikal para pendaki seramai 20 orang kesemuanya yang mana 14 orang merupakan kakitangan UTeM dan selebihnya ahli Kelab Esprit de Corp.



PRAKTIS UTeM *anjur* Program Administrative Talk

Persatuan Pegawai Tadbir dan Ikhtisas (PRAKTIS) UTeM telah menganjurkan program Administrative Talk Untuk Golongan Pentadbir bertempat di Dewan Auditorium Canselori Kampus Induk Durian Tunggal baru-baru ini.

Menurut Presiden PRAKTIS Misdom Bin Lan berkata, antara objektif utama diadakan program ini antaranya adalah untuk mengajak golongan pentadbir universiti ini supaya berada pada keadaan yang lebih bersedia dalam mendepani segala bentuk tuntutan semasa selaras dalam menjayakan proses transformasi universiti ini.

Program Administrative Talk ini telah disampaikan oleh penceramah jemputan yang tidak asing lagi dalam pentadbiran IPTA iaitu Pendaftar dari Universiti Teknologi Mara (UiTM), Dr Hajah Zaharah Mokhtar.

Tambah Misdom lagi dengan terlaksananya program sebegini maka ianya mampu memberi sebahagian gambaran dan panduan kepada golongan pentadbir bagi meneruskan agenda transformasi universiti di samping menyambung kesinambungan dan kecemerlangan pentadbiran universiti ini.

ReCCA Serlahkan Prestij Sukan Rekreasi IPT

ReCCA UTeM 2011 yang telah diadakan selama tiga hari berturut-turut bermula pada 15 April hingga 17 April 2011 lalu bertempat di Kampus Induk UTeM sebagai salah sebuah universiti sukan rekreasi di Malaysia.

Antara jenis sukan rekreasi yang telah diketengahkan bagi program ini ialah Paintball, Mendaki Tembok Tiruan, Kayak Slalom, Basikal Bukit, Orienteering, Ultimate Frisbee, X-Games (skateboard / basikal BMX) dan Pacuan ATV (All Terrain Vehicles).

Karnival sukan rekreasi yang bertemakan 'Transcendence Through Outdoor' ini telah mendapat sambutan daripada beberapa IPT lain dari luar Melaka antaranya Universiti Putra Malaysia (UPM), Universiti Tun Hussein Onn (UTHM), Universiti Teknologi MARA (UiTM) Lendu, Kolej Komuniti Selangor serta banyak lagi.



INOTEK 2011 UTeM Martabatkan Budaya Inovasi Mahasiswa

Penganjuran pertandingan inovasi Innovation and Technology Competition 2011 (INOTEK 2011) oleh Fakulti Kejuruteraan Elektronik dan Kejuruteraan Komputer (FKEKK) membuktikan kesungguhan universiti ini dalam membudayakan inovasi di kalangan mahasiswanya.

Perkara tersebut dinyatakan oleh Timbalan Naib Canselor (Penyelidikan dan Inovasi) Prof. Dato' Dr. Mohamad Kadim Suaidi ketika merasmikan pertandingan inovasi itu di Dewan Seminar FKEKK di Kampus Induk Durian Tunggal. Dalam ucapannya Kadim berkata, UTeM sentiasa memandang jauh ke hadapan terutama sekali dalam hal berkaitan inovasi berteknologi tinggi. Maka dengan itu, pihak universiti amat menggalakkan semua fakulti di UTeM untuk menganjurkan program sedemikian, katanya.

Pertandingan INOTEK 2011 melibatkan penyertaan mahasiswa tahun akhir FKEKK yang diadili oleh wakil-wakil fakulti dan industri antaranya Telekom Malaysia (TM), Agilent Technologies, Dyson Manufacturing, YTL Communications dan Infineon Technologies. Pada tahun ini, sebanyak 217 projek pelajar sarjana muda dan 40 projek pelajar diploma FKEKK dipertandingkan.

Menurut Dekan FKEKK, Prof. Madya Abdul Rani Othman berkata, pertandingan ini meliputi kluster penyelidikan fakulti antaranya elektronik pengguna, sistem jalur lebar, multimedia, gelombang mikro serta kejuruteraan komputer.



FKE ANJUR PERTANDINGAN INOVASI DENOTECH 2011

Fakulti Kejuruteraan Elektrik (FKE) telah menganjurkan pertandingan inovasi yang dinamakan Design and Innovation Technology 2011 (DENOTECH 2011) pada 21 April lalu.

Menurut Zamani Md. Sani, Pensyarah di Jabatan Mekatronik FKE merangkap Pengarah projek pertandingan itu berkata, DENOTECH 2011 dianjurkan dengan tujuan untuk memupuk budaya inovasi di kalangan mahasiswa UTeM serta memilih hasil ciptaan yang berpotensi untuk dimajukan bagi menyertai pertandingan peringkat kebangsaan mahupun antarabangsa.

Menurut Zamani lagi, sebanyak 45 Projek Sarjana Muda (PSM) dari fakulti tersebut dipertandingkan di samping penyertaan daripada fakulti-fakulti lain di UTeM. Melalui pertandingan itu, penyertaan akan dikategorikan kepada dua iaitu kategori Perkakasan dan Poster atau Simulasi.

DENOTECH 2011 menyaksikan pemenang-pemenang meraih hadiah wang tunai dan sijil penghargaan di samping berpeluang untuk menyertai pertandingan inovasi yang dianjurkan dari masa ke semasa. Dekan FKE, Prof. Madya Dr. Zulkifli Ibrahim telah merasmikan pertandingan tersebut.




FKP anjur Pameran Projek Rekabentuk Pelajar

Fakulti Kejuruteraan Pembuatan (FKP) telah menganjurkan Pameran Projek Rekabentuk yang disertai oleh pelajar-pelajar diploma tahun akhir fakulti tersebut. Menurut Ketua Jabatan (Pengajian Diploma), Engr. Zolkarnain Markom berkata, pameran tersebut diadakan dengan tujuan untuk memberi peluang pelajar-pelajar tahun akhir untuk mempamerkan hasil inovasi mereka kepada umum.

Selain itu katanya lagi, acara tersebut merupakan platform kepada pelajar untuk meningkatkan daya penyampaian dalam memberikan penerangan terhadap produk yang dipamerkan di samping memupuk minat pelajar dalam menghasilkan produk bermutu tinggi.

Pameran tersebut mendapat sambutan menggalakkan daripada seluruh warga universiti, institusi pengajian tinggi dan sekolah-sekolah sekitar Melaka.



Pelajar Cemerlang FKE & FTMK Diraikan

Fakulti Teknologi Maklumat & Komunikasi (FTMK) mengiktiraf pelajar cemerlang dalam bidang akademik dengan melangsungkan Majlis Anugerah Sijil Kepujian Dekan Semester satu bagi sesi akademik 2010 / 2011. Majlis telah diadakan di Dewan Seminar FTMK Kampus Induk UTeM Durian Tunggal baru-baru ini.

Seramai 119 pelajar dari fakulti ini bagi peringkat Diploma Teknologi Maklumat & Komunikasi serta Ijazah Sarjana Muda Sains Komputer dari pelbagai pengkhususan telah menerima Sijil Kepujian Dekan kerana telah mempamerkan kecemerlangan dalam bidang akademik dengan GPA 3.50 dan ke atas.

Manakala Fakulti Kejuruteraan Elektrik (FKE) juga telah melangsungkan Majlis Anugerah Sijil Kepujian Dekan bertempat di Dewan UTeM 1 Kampus Industri Taman Tasik Utama Ayer Keroh baru-baru ini.

Seramai 229 orang pelajar Semester 2 Sesi 2009/2010 dan 213 orang pelajar Semester 1 Sesi 2010/2011 dari fakulti ini daripada pelbagai kursus dan pengkhususan telah berjaya memperolehi anugerah sijil kepujian Dekan.



Pelajar Kolej Komuniti Paya Besar Pahang Kagumi Hasil Inovasi UTeM

Kolej Komuniti dari negeri Pahang iaitu Kolej Komuniti Paya Besar, Gambang Pahang Darul Makmur telah mengadakan lawatan sambil belajar ke UTeM baru-baru ini. Rombongan itu terdiri daripada tiga orang pensyarah bersama 38 orang pelajar aliran kejuruteraan.

Menurut Pegawai Unit Promosi UTeM Noor Muhammad Afiq Ismail berkata, antara tujuan utama pihak kolej ini mengadakan lawatan ke UTeM adalah untuk mendapatkan pendedahan mengenai kursus atau bidang pengajian yang ditawarkan oleh universiti ini.

Para pelajar dan pensyarah dari Kolej Komuniti ini telah diberikan pendedahan dan penerangan lanjut di Fakulti Kejuruteraan Elektronik dan Kejuruteraan Komputer (FKEKK). Salah satu hasil inovasi yang berjaya menambat hati rombongan ini ialah Kincir Air UTeM yang telah siap dibina di kawasan tasik universiti ini.



FPTT anjur Majlis Sepetang Bersama Teknousahawan

Fakulti Pengurusan Teknologi dan Teknousahawanan (FPTT) telah menganjurkan program Sepetang Bersama Teknousahawan bertempat di Kampus Bandar Jalan Hang Tuah baru-baru ini.

Menurut Pengarah Program ini Isma Addi Jumri berkata, antara objektif utama diadakan program ini adalah untuk memberikan pendedahan awal kepada pelajar FPTT tentang kepentingan teknousahawanan yang menjadi tunggak utama pembangunan ekonomi negara.

Seterusnya menerusi majlis ini juga mampu memberikan kefahaman secara langsung kepada pelajar dengan melibatkan teknousahawan jemputan sekitar Melaka dan individu yang terlibat dalam industri serta bidang perniagaan dalam proses pengajaran dan pembelajaran mereka.

Tambah beliau lagi, dengan adanya majlis sebegini ianya juga menjadi platform bagi membentuk jaringan dengan teknousahawan dan seterusnya membina kemahiran berkomunikasi melalui interaksi bersama teknousahawan yang dijemput.

Lebih daripada 200 orang pelajar FPTT khususnya pelajar tahun pertama yang mengambil subjek Teknousahawanan tidak melepaskan peluang bagi mengikuti majlis Sepetang Bersama Teknousahawanan ini.



Lawatan Tokoh NILAM Di UTeM - Martabatkan Budaya Membaca Di Kalangan Generasi Muda

Bahagian Teknologi Pendidikan Negeri Melaka (BTPN Melaka) dengan kerjasama Jabatan Pelajaran Melaka (JPM) dan Persatuan Perpustakaan Sekolah-sekolah Negeri Melaka (PUSTAKAM) telah menganjurkan Projek Memperkasa Tokoh NILAM (Pertandingan Nadi Ilmu Amalan Membaca) 2011.

Pelajar-pelajar berkenaan adalah Khazwanie Binti Karim, dari (SK) Ujong Pasir bagi kategori sekolah rendah Bandar, Siti Nur Alia Binti Safri, dari (SK) Serkam bagi kategori sekolah rendah luar bandar, Nur Shafiqah Binti Mohd Noh, dari (SMK) Bukit Baru bagi kategori sekolah menengah bandar dan Normujahidah Binti Hashim, dari (SMA) Sharifah Rodziah bagi kategori sekolah menengah luar bandar. Keempat-empat mereka ini adalah pelajar yang telah berjaya melayakkan diri dalam mewakili kategori masing-masing.

UTeM telah menjadi salah satu dari tempat yang telah dipilih oleh pihak penganjur bagi pelajar-pelajar ini untuk mengembangkan kemahiran dan pengetahuan mereka. Pelajar-pelajar tersebut telah dibawa melawat kemudahan yang terdapat di fakulti serta diberi penerangan mengenai peluang pendidikan, kerjaya serta berpeluang untuk meninjau dengan lebih dekat suasana sebuah universiti teknikal yang tersohor di negeri ini.



UTeM Sertai Kursus Pengauditan Universiti

Kakitangan Unit Audit Dalam (UAD) UTeM telah menyertai Kursus Asas Audit Dalam IPTA yang dianjurkan oleh Jawatankuasa Latihan Unit Audit Dalam IPTA Malaysia telah diadakan di Bandaraya Melaka baru-baru ini.

Menurut Pengerusi Program, Hj Jalani Bin Hassan berkata, usaha pihak Jawatankuasa latihan menganjurkan kursus ini adalah bertepatan sekali dengan keperluan semasa kini bahawa bidang pengauditan memainkan peranan utama dalam membantu pihak pengurusan kewangan, operasi serta pengurusan risiko di seluruh IPTA dalam negara kita.

Tambah beliau lagi, bidang pengauditan juga turut dilihat sebagai elemen yang memberi kesan yang lebih besar kepada bidang-bidang lain dalam sektor awam. Kejayaan dan kegagalan sesebuah organisasi adalah berkait rapat dengan aspek keberkesanan fungsi dan peranan UAD juga.

Sememangnya penglibatan UTeM yang turut sama mengikuti kursus ini menampakkan universiti ini turut tidak terkecuali dalam memastikan pelaksanaan proses pengauditan sentiasa memenuhi keperluan dan standard semasa.



Majlis Pelancaran Pelaksanaan Sistem Pengurusan Berkualiti Pejabat Pendaftar



Program Pelaksanaan Sistem Pengurusan Kualiti Pejabat Pendaftar anjuran Unit Perancangan Pejabat Pendaftar telah berlangsung dengan jayanya serta mendapat sambutan positif daripada warga Pejabat Pendaftar yang menyertainya baru-baru ini. Program ini telah diadakan di Auditorium Canselori Kampus Induk UTeM.

Menurut En.Wahi bin Nordin, Ketua Timbalan Pendaftar berkata, antara objektif utama majlis ini diadakan adalah untuk melancarkan pelaksanaan Sistem Pengurusan Kualiti Pejabat Pendaftar dalam memperoleh persijilan MS ISO 9001: 2008 selaras dengan pembangunan dan pelaksanaan Balanced Scorecard Universiti khususnya Pejabat Pendaftar bagi tempoh 5 tahun bagi jangka masa 2010-2015.

Sehubungan dengan itu, Persijilan MS ISO 9001 : 2008 merupakan antara Penunjuk Prestasi (KPI) utama Pejabat Pendaftar dalam usaha mencapai misi untuk menerajui pengurusan dan pembangunan sumber manusia, pengurusan akademik serta perkhidmatan berorientasikan pentadbiran yang berkualiti, efektif dan dinamik, katanya lagi.

FTMK Ungguli Acara Bowling Sukan Antara Jabatan UTeM



Pasukan Fakulti Teknologi Maklumat dan Komunikasi (FTMK) telah mengungguli acara bowling Sukan Antara Jabatan 2011 (SAJ 2011) yang diadakan di Melaka International Bowling Centre (MIBC) setelah menjadi johan keseluruhan dalam acara ini.

FTMK telah memenangi dalam acara mata tertinggi wanita oleh Prof. Madya Dr. Faaizah Sahabodin dengan jatuhnya 164 pin, Johan dalam acara bergu oleh Prof. Madya Dr. Faaizah Sahabodin dan Prof. Madya Norhaziah Salleh, johan dalam acara trio melalui Prof. Madya Dr. Faaizah Sahabodin, Prof. Madya Norhaziah Salleh dan Safiza Suzana Kamal Baharin dan juga johan dalam acara berpasukan.

Manakala bagi acara individu lelaki pula dimenangi oleh Mohd. Fauzi Ab. Rahman dari Fakulti Kejuruteraan Elektronik dan Kejuruteraan Komputer (FKEKK), beregu lelaki dimenangi pula oleh Asrulhafiz Dzulkifli dan Rejab Md Diah dari pasukan campuran Canselori dan Penerbit Universiti manakala bagi acara trio dimenangi oleh Hamiddy Othman, Zulkarnain Shariff dan Suhaimi Hashim dari Pejabat Pembangunan.

Turut hadir bagi memeriahkan pertandingan ini ialah Naib Canselor UTeM Prof Datuk Dr Ahmad Yusoff Hassan yang membawa cabaran mewakili pasukan Canselori.

PINTAR FTMK Mantapkan Pemahaman Visi dan Misi UTeM

Warga Fakulti Teknologi Maklumat dan Komunikasi (FTMK) telah menyertai Program Integrasi Insan Terbilang (Pintar) Siri 4 2011 yang bertempat di Ilham Resort Port Dickson, Negeri Sembilan baru-baru ini.

Menurut Naib Canselor UTeM, Prof Datuk Dr. Ahmad Yusoff Hassan berkata, antara objektif utama diadakan program Pintar adalah untuk memantapkan lagi pemahaman warga UTeM terhadap pencapaian visi dan misinya dengan menggunakan pendekatan berasaskan kaedah pembelajaran melalui pengalaman.

Turut dimuatkan semasa program berlangsung ialah kemahiran berkomunikasi dan kepimpinan, teknik berfikir secara kreatif serta pemupukan nilai-nilai kerohanian. Program yang dianjurkan oleh Unit Latihan Bahagian Pembangunan Sumber Manusia (BPSM) itu turut mendapat sokongan daripada pegawai-pegawai kanan UTeM yang hadir sebagai fasilitator untuk membimbing para peserta.



Pusat Islam UTeM Bersama JAIM Anjurkan Program Baitu Saadah

Pusat Islam UTeM dengan kerjasama Jabatan Agama Islam Negeri Melaka (JAIM) telah menganjurkan program Baitu Saadah sesi 1/2011 di Auditorium Dewan Canselori baru-baru ini dengan penyertaan seramai 150 orang staf dari pelbagai PTJ.

Menurut Pengarah Program ini Dr. Raduan bin Nordin, antara objektif utama diadakan program ini adalah untuk memberikan kefahaman yang sebenar kepada peserta yang telah mendirikan rumahtangga agar dapat mempraktikkan ajaran Islam dalam mencari keredhaan Allah seterusnya dapat mengekalkan kebahagiaan dalam kehidupan berumahtangga.

Seterusnya program ini juga mampu memberikan pengetahuan, kefahaman dan kemahiran dalam membentuk serta memantapkan Institusi kekeluargaan yang telah didirikan agar dapat menjadi sebuah keluarga yang harmoni sekaligus melahirkan institusi rumahtangga yang mengamalkan ajaran Islam yang sebenar.

Tambah beliau lagi, dengan adanya program sebegini ianya juga dapat melahirkan keluarga yang bahagia dan masyarakat sejahtera yang menjadikan Islam sebagai wadah perpaduan ummah seterusnya menjalani kehidupan berkeluarga selari dengan kehendak al-Quran dan as-Sunnah.

PKKP ANJUR KURSUS DEDAHKAN TANGGUNGJAWAB KESELAMATAN DAN KESIHATAN PEKERJAAN

Pejabat Keselamatan dan Kesihatan Pekerjaan (PKKP) telah menganjurkan Kursus Peranan dan Tanggungjawab Jawatankuasa Keselamatan dan Kesihatan Pekerjaan serta Tatacara Siasatan Kemalangan di Auditorium Pusat Pengajian Siswazah baru-baru ini.

Kursus tersebut dihadiri oleh ahli-ahli Jawatankuasa Keselamatan dan Kesihatan Pekerjaan daripada seluruh fakulti dan PTJ bagi mendapatkan panduan mengenai peranan yang dimainkan untuk mengelakkan risiko kemalangan serta ketika menghadapi situasi kecemasan.

Peserta yang hadir turut didedahkan mengenai tatacara siasatan kemalangan dengan lebih terperinci oleh penceramah yang diundang khas. Rata-rata peserta yang mengikuti kursus tersebut berpuashati terhadap panduan yang diperolehi sepanjang program tersebut.

<EXIT>

Berita Perkahwinan

Lahniah
Berita@UTeM mengucapkan selamat pengantin baru kepada pasangan berikut yang telah melangsungkan perkahwinan baru-baru ini.

Nor Hafsa binti Hishah dari Pusat Pengurusan Penyelidikan dan Inovasi (CRIM) bersama pasangannya Mohd Khairul bin Hj Hassan yang melangsungkan perkahwinan pada 30 April 2011.



Zaffaruddin bin Hamzah dari Pejabat Perancangan dan Komunikasi Korporat (PPKK) bersama pasangannya Hafizatulazlin binti Abdul Aziz yang melangsungkan perkahwinan pada 30 April 2011.





MOHAMAD SAUFI BIN ALIMAT
JURUTEKNIK
FAKULTI KEJURUTERAAN MEKANIKAL (FKM)

Berasal dari Merlimau, Mohamad Saufi memulakan perkhidmatan di UTeM pada tahun 2008. Bapa kepada tiga orang cahaya mata ini bertugas di Jabatan Struktur dan Bahan FKM.

Seorang yang ceria dan peramah, Mohamad Saufi sangat aktif dalam sukan ping-pong. Bakat dan keazaman beliau dalam sukan tersebut telah membantu FKM menjuarai Sukan Antara Jabatan 2011 (SAJ 2011). Beliau juga menabur bakti mewakili UTeM dan Negeri Melaka pada kejohanan-kejohanan ping-pong bertaraf kebangsaan.

Menggemari kuey teow goreng, Mohd Saufi akan mengisi masa lapangnya dengan membaca. Bahan bacaan yang menarik perhatian beliau adalah yang berbentuk ilmiah. Katanya lagi, membaca dapat memberi ketenangan di samping menambah ilmu di dada.

Pada masa ini Mohamad Saufi menumpukan perhatian memperbaiki teknik dan kemahiran ping-pong sebagai persediaan kejohanan yang akan datang.



NORLIZAWATI BINTI AB. RAHAMAN
PEMBANTU TADBIR (P/O)
CANSELORI

Lebih mesra dengan panggilan Liza, Norlizawati Ab. Rahaman menyertai UTeM pada tahun 2003. Pada ketika itu, beliau ditempatkan di Unit Senat dan Konvokesyen, Pejabat Pendaftar. Berkhidmat selama tujuh tahun di Pejabat Pendaftar memberi pengalaman dan ilmu pengetahuan yang tiada tolok bandingnya buat diri Liza.

Bekas penuntut di Sekolah St. David ini sering memenuhkan masa lapangnya dengan membaca novel.

Beliau yang kini menetap di Bukit Beruang, Melaka merupakan penggemar masakan lemak cili padi.

Kini Liza berkhidmat di Pejabat Perancangan dan Pembangunan Akademik, Canselori. Pengalaman sewaktu di Pejabat Pendaftar digunakan sepenuhnya untuk mengendalikan mesyuarat-mesyuarat penting universiti terutama sekali berkaitan perancangan akademik.

UTeM yang dipilih sebagai Sekretariat penganjuran Imagine Cup 2011 kini berada di fasa terakhir persiapan sebelum menghadapi pertandingan sebenar pada 4-6 Mei ini. Menjelang detik tersebut, ikutilah beberapa program yang telah diatur bagi menjadikan Imagine Cup 2011 acara yang terbaik pernah dianjurkan.

2 April 2011

Mesyuarat juri Imagine Cup 2011 telah diadakan di ibu pejabat Microsoft Malaysia di KLCC. Pada mesyuarat tersebut para juri yang dilantik diberi taklimat mengenai kriteria penghakiman serta membincangkan perkara berkaitan pemilihan wakil negara ke New York kelak. Juri Imagine Cup 2011 terdiri daripada pakar-pakar dalam bidang teknologi maklumat, keusahawanan serta pelbagai disiplin lain.

6 April 2011

Prestariang Systems sebuah syarikat peneraju ICT negara tampil memberi sokongan terhadap penganjuran Imagine Cup 2011 dengan menghulurkan sumbangan sebanyak RM 70 ribu. Ketua Pegawai Eksekutif Prestariang, Dr. Abu Hasan Ismail menyerahkan sumbangan tersebut kepada Naib Canselor, Prof. Datuk Dr. Ahmad Yusoff Hassan yang juga Pengerusi penganjuran Imagine Cup 2011.

Menurut Dr. Abu Hasan, tajaan tersebut sebagai menyokong usaha Microsoft dan KPT menjadikan pertandingan mencipta perisian sebagai platform untuk melahirkan mahasiswa yang berdaya saing dalam bidang ICT.

25 April 2011

Ketua Pengarah Jabatan Pengajian Tinggi (JPT) Prof. Dr. Rujhan Mustafa muncul secara 'live' dalam siaran Selamat Pagi 1Malaysia di TV1 yang membicarakan mengenai kehangatan Imagine Cup 2011 di Kuching nanti. Beliau yang ditemuramah oleh hos pada pagi tersebut melahirkan harapan agar pasukan yang mewakili Malaysia di New York kelak dapat mengharumkan nama negara di pentas antarabangsa.

26 April 2011

Prof. Datuk Dr. Ahmad Yusoff Hassan ditemuramah dalam rancangan Hello On Two di TV2 bagi mengajak seluruh rakyat Sarawak terutama di Kuching untuk hadir melihat kecanggihan perisian yang dihasilkan oleh peserta akhir Imagine Cup 2011. Menurut beliau, kualiti penyertaan pada tahun amat tinggi jika dibandingkan dengan tahun-tahun sebelumnya. Lantaran itu, kata beliau lagi pasukan yang bertanding akan berusaha bersungguh-sungguh mempamerkan kehebatan bagi merebut tempat ke pertandingan akhir di New York pada Julai ini.



"UTeM" KAMPUS

BEBAS ASAP ROKOK

NO SMOKE NO TOBACCO NO SMOKE NO TOBACCO NO SMOKE NO TOBACCO



UTeM telah menyahut seruan kerajaan negeri dengan melaksanakan program 'UTeM Kampus Bebas Asap Rokok' yang telah diadakan selama empat hari berturut-turut bermula pada 9 April 2011 hingga 12 April 2011 di Kampus Induk UTeM Durian Tunggal.

Majlis perasmian program telah mendapat kerjasama penuh daripada Jabatan Kesihatan Negeri (JKN) dengan kehadiran Pengarah JKN Dato' Dr. Hj Azmi Hashim.

Dato' Dr Azmi Hashim menyatakan pihaknya menyambut baik langkah UTeM bagi melaksanakan program sedemikian kerana ini menampakkan kematangan pihak universiti selaku IPTA yang turut sama menjalankan kempen ini demi memastikan tahap kesihatan yang tinggi dalam kalangan warganya, ujar beliau ketika ditanya oleh pihak media di sini.